

بِسْمِ اللَّهِ الرَّحْمَنِ الرَّحِيمِ



Khutba Jummah

Hazrat Khalifatullah Muwih. A. Azim (atba)

27 Décembre 2019

30 Rabi'ul Aakhir 1441 AH

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lors :

VINE BANE AIDES D'ALLAH !

يَا أَيُّهَا الَّذِينَ ءَامَنُوا كُونُوا أَنْصَارَ اللَّهِ كَمَا قَالَ عِيسَى ابْنُ مَرْيَمَ لِلْحَوَارِيِّينَ مَنْ أَنْصَارِي إِلَى اللَّهِ قَالَ الْحَوَارِيُّونَ نَحْنُ أَنْصَارُ اللَّهِ فَأَمَّتْ طَائِفَةٌ مِّنْ بَنِي إِسْرَائِيلَ وَكَفَرَتْ طَائِفَةٌ فَأَيَّدْنَا الَّذِينَ ءَامَنُوا عَلَىٰ عَدُوِّهِمْ فَأَصْبَحُوا ظَاهِرِينَ

Yaaa-'ayyuhal-laziina 'aamanuu kuunuuu 'ansaarallaahi kamaa qaala 'Isabnu-Maryama lil-Hawaariyyiina man 'ansariiii 'ilallaah? Qaalal-Hawaariyyuuna nahnu 'ansaarullaahi fa 'aamanat-taaa-'i fatum-min-Banii-'Israaa-'iila wa kafarat-taaa-'ifah. Fa-'ayyadnal-laziina 'aamanuu 'alaa 'aduwwihim fa-'asbahuu zaahiriin.

« Ô bane ki fine amène Imaan (Ô bane croyants)! Vine bane alliés [aides] d'Allah, pareil couma Jésus fils de Marie fine dire à [so] bane disciples: « Ki sanlà pou vine mo bane aides (pour la cause) d'Allah? » - Bane disciples fine dire: « Nous bane alliés d'Allah ». Ene groupe de bane Z'enfants d'Israël fine [alors] croire, tandis ki ene groupe pas fine croire. Nous fine donc aide bane ki fine croire contre zot bane l'ennemi, et zot fine gagne la victoire. » (As-Saff 61: 15)

Dans l'histoire de bane nations, zot ti parfois obligé pou prend certains décisions fondamentales. Sa ti applique à bane communautés du monde et aussi à bane communautés divines (c.-à-d., mondaines et spirituels). Kan zot ti confronté à ene telle situation, alors couma sa parole bien connu dire, zot ti bizin décider : « *exister ou pas exister?* » [*être, ou ne pas être ?*]. Sa ti la question. Aujourd'hui, la question c'est pou conner si pas ou pou capave alle en avant ou sois eski ou pou mort.

Dans le monde religieux, puisque l'origine de la foi li de source divine, sa option là li pas applicable. Fine fini décrété depuis lontan ki bane communautés divines pou contigner faire progrès. Zamais pas ena la question de kit retraite (ou défaite). Pour atteindre le but ki fine fixé pou zot, zot bizin toujours prêts à tout sacrifier. Ene telle l'occasion fine maintenant présenté dans l'histoire du Jamaat Ul Sahih Al Islam. Sa verset ki mo fine réciter là convenir aussi le mieux dans nous l'époque.

Même si Jésus (as), le Messie et Prophète d'Allah fine mort, mais so image [c'est-à-dire, ene dimoune couma li] fine vini encore ene fois dans sa l'époque là grâce à la volonté d'Allah afin pou donne zot tous ene nouvo la vie. Si bane chrétiens et bane musulmans ti compran vrai portée de sa vérité là, zot ti pou arrête attane la descente physique de Jésus, fils de Marie, prophète ki Allah ti envoyer à bane Israélites.

Maintenant, ene nouvo l'époque fine commencé. Sa l'époque là li celui de l'islam et sa pou contigner perpétuellement jusqu'à la fin des temps. Même si l'origine de tous bane religions ou confessions li divine, mais au cours de tous sa bane siècles là, bane dimounes fine perdi zot essence originelle, c'est-à-dire, l'unité d'Allah [le *Tawheed*]. De ce fait, avec le temps, l'association avec Allah [c'est-à-dire, le *Shirk*] fine prend ene l'ampleur et fine répanne dans bane religions ki ti fondamentalement monothéistes et vraies. Zot bane l'enseignements fine falsifiés pour assouvir la soif de pouvoir de bane grands prêtres et pandits modernes etc.

Mais maintenant, avec l'avènement d'ene homme de Dieu ki fine vini dans le manteau du Saint Prophète Muhammad (saws) pour faire revivre bane vrais l'enseignements de tous bane confessions précédents, le temps li cruciale, et ene aide li nécessaire pour casse et écrase tous bane fausses doctrines ki fine infiltré dans la foi pure [c'est-à-dire, l'islam].

Le Saint Coran ordonne à bane ki croire pou présente zot de l'avant couma : bane aides pour la cause d'Allah, de la même manière ki Jésus (as), le fils de Marie ti demande à so bane disciples: « *Ki sanlà pou aide moi pour Allah ?* » Alors Allah fine permette à ene partie de bane Z'enfants d'Israël [Bani Israël] pou gagne la foi tandis ki ene l'autre partie pas fine gagne la foi, zot pas fine croire.

De plus, Allah dire: « **Nous fine donc aide bane ki fine croire contre zot bane l'ennemi, et zot fine gagne la victoire.** »

La mention de sa incident là dans le Saint Coran paraite extrêmement surprenant quand nous considère bane ressources insignifiants, bane ti ressources ki ti disponibles pour bane à qui Jésus (as) fine demande l'aide. Zot ti nek quelques dimounes ki ti sans le sou, ki ti pareil couma bane ermites [c'est-à-dire, zot ti ressembler bane dimounes ki pas ena kit richesses matérielles et ki vivre en retraite, loin de bane dimounes et la société]. Sa bane là ti vive dans ene grand l'empire ki dominé par l'Ouest, ki so bane frontières ti étendre de l'Ouest jusqu'à l'extrême Est. Dans bane la villes et régions kot zot ti pé rester, sa bane dimounes là ti ena bien tiguitte influence, bien tiguitte pouvoir. Zot ti tellement opprimés et impuissants kan Jésus (as) ti crucifié ki zot pas ti capave fer nannié. Alors, eski li pas ene kitchose bien étrange ki Jésus (as) fine demande l'aide à ene peuple ki, apparemment [en apparence], pas ti en mesure pou apporte kit l'aide? Pourtant, l'attention de Hazrat Muhammad (saws) fine être attirée lors sa incident là et li fine gagne instruction pou adresse so bane partisans dans bane termes [paroles] similaires.

Nous bizin garde à l'esprit ki bane disciples de Jésus (as) ti persécuté non pas parski zot ti pauvres et impuissants mais à cause de zot la foi dans Jésus (as), [Hazrat Isa (as)], ene tel dimoune ki ti proclame li comme le Messie et ki fine remette en question bane pratiques divergents de bane Juifs de l'époque. Étant persécutés pour bane motifs religieux, sa montrer ki sa bane l'aide ki Allah et So Messie Jésus (as) et So Saint Prophète Muhammad (saws) ti roder ti bien loin de saki concerne bane z'affaires de sa le monde là. En d'autres mots, l'aide ki Allah ti pé roder de zot pas ti à aucaine moment matériel.

De ce fait, apparemment, le fait ki li pas ene z'affaire mondaine, le besoin de l'heure pas ti ni recherche le service de bane guerriers forts, braves et audacieux ni service de bane hommes d'État riches et puissants du monde. En fait, aucaine

de sa bane groupes d'élite là pas ti présente zot pour fer bane tels sacrifices. Seulement parmi bane ki fine être privés de zot droits de citoyenneté, bane ki fine être ridiculisé, maltraité et fine gagne battu dans ene façon impitoyable et ki fine être traînés dans bane la rues publique, c'est sa bane là ki, malgré zot impuissance et zot handicap, c'est zot ki fine montrer zot à la hauteur et fine recevoir invitation de Jésus (as) pou vine de l'avant comme bane aides d'Allah. Si sa pas ti ene message caché d'ene grand l'importance, sa incident là pas ti pou être transmis par Allah [dans Quran Shareef] en s'adressant au Saint Prophète (saws), kot Allah pé demande li pou demande l'aide [avec bane disciples] dans bane façons similaires [couma Jésus ti faire]. Eski sa l'aspé là pas paraite surprenant ?

Anou guette sa sous ene l'autre l'angle. Eski Allah bizin kit l'aide Li ? Au fait, la notion de aide même li réserver pour bane dimounes, surtout bane dimounes ki opprimé ou en grand difficulté, kot alors c'est zot ki demande l'aide avec Allah et avec bane les autres êtres humains couma zot-mêmes. Allah Li suffit à Li-même et Li pas bizin aucaine aide. Le fait ki nous So bane créatures ki bien faibles, c'est nous ki bane nécessaires, c'est nous ki bizin l'aide, pas Li.

Aujourd'hui aussi, le temps li critique. L'homme fine perdi so bane repères dans la foi et même capave appelle li musulman lors la lèvres tousel, kot so bane actions pas réfléchir l'islam ditout. Et à cause de sa dérive loin de bane l'enseignements d'Allah, bane non-musulmans, en particulier bane grandes puissances du monde, pé rode craze bane musulmans, kot pé prend zot, pé prend nous couma ene menace. Secrètement, zot gagne peur ki si **TOUS BANE MUSULMANS** arriver unir à nouveau, zot/ nous pou conquérir le monde et pou agir couma ene grand barrière entre zot et zot bane mauvais désirs, et l'Islam pou répanne dans le monde entier, prenant en charge non seulement comme ene la foi mais aussi comme le Vrai Façon de Vivre, en tant ki ene gouvernement au pouvoir.

Aujourd'hui aussi, bien ki zot pas forme parti du Jamaat Ul Sahih Al Islam, mais nous bane les autres frères musulmans pé souffert beaucoup dans le monde. Récemment dans l'Inde aussi, sa pharaon *Zaalim* là, Narendra Modi avec so projet pou faire de l'Inde, ene nation entièrement Hindu pé écrase bane réfugiés musulmans dans l'Inde, kot li pé refuse zot la citoyenneté indienne juste parski zot bane musulmans! Quant à bane réfugiés non-musulmans, zot pas pé subir le même sort ki bane musulmans.

Ainsi, zot trouver couma sa verset Quran là appliquer aujourd'hui pareil couma li ti appliquer dans l'époque de Jésus (as) et du Saint Prophète Muhammad (saws); en fait, dans tous l'époques de bane prophètes et de bane élus d'Allah. Donc, tant ki nous prêts pou aide la cause d'Allah avec tout nous les cœurs et avec tout nous l'âme, So secours pas pou déssane. Nous bizin uni nous. Allah oulé ki nous uni. Si bane musulmans pas rende zot compte de sa maintenant, alors kan eski zot pou rende zot compte de sa ?

Allah Li pas influencé par le nombre, la force ou position élevée de bane adeptes [suivants] d'ene groupe. Sa bane chiffres [nombres] et sa puissance apparente là zot complètement hors de propos, parski la puissance d'Allah domine tout. Mais Allah, à travers bane épreuves, rode conner à ki point bane dimounes zot prêts pou aide Li, c'est-à-dire, à ki point zot prêt pou combatte pour So cause, pour la vérité.

Quant à bane dictateurs et bane ki assoiffés de pouvoir, Allah capave fini zot ene sel coup. En moins d'ene seconde, Li capave ordonne pour zot ene mauvais sort. Sa question là alors révine de l'avant : « *être ou ne pas être?* » [Exister ou pas exister ?] Allah ena la capacité pou fer zot disparaite bien vite, sans ki zot attane [couma z'éclair] comme si jamais zot ti exister ! Mais ena ene lé temps fixé pour tout z'affaire.

Quant à bane vrais musulmans ki pieux, malgré zot manque de richesses mondaines, mais Allah ena le pouvoir pou faire zot [vine] bane maîtres de sa lé monde là, aussi bien spirituellement ki matériellement. Mais l'aide ki Allah rechercher auprès de bane croyants ena ene signification spirituelle. Si ene pauvre ena 7 (sept) roupies et ki li donne tout sa dans la cause d'Allah dans ene l'esprit de sacrifice et de piété, eski zot penser ki Allah pas pou aide li ? Eski Allah pas pou satisfait avec li? Eski zot penser ki Allah bizin so tiguette l'argent ki li ena ? Non! Mais saki Allah veut dire c'est ki sak l'argent ki zot faire z'effort pou contribuer dans So chemin, pour So *Deen*, Allah pou récompense zot plisse ki sa.

Aujourd'hui, en tant ki humble serviteur et en toute soumission à Li (Allah), mo transmette zot le même message. Jamais dans l'histoire de l'Islam ene crise d'ene telle l'ampleur fine apparaite. Mo demande donc à tous bane musulmans de sa le monde là: **Ki sanlà pou vine mo bane aides dans la cause d'Allah?**

Ô bane serviteurs bien-aimés d'Allah de sa l'époque là, au nom d'Allah, mo demande zot pou accorde zot l'aide. Présente tout saki zot ena à Allah, et mo faire serment par le Tout-Puissant ki Li pou dirige fonction de tous bane recours de So bane créations à zot service. Aucaine pouvoir lors la terre pas pou capave modifier sa décret divine là. Sa événement là fine destiné et pas pou capave ena kit les autres conséquences excepter le succès puisque c'est sa ki fine être décrété.

Allah faire miséricorde à sa bane serviteurs opprimés et impuissants ki donne tout saki zot ena pour aide So cause; et en retour Allah accorde So l'aide. Allah fine explique sa dans ene façon bien clair. Eski nous aussi, pour tester la réaction de nous bane z'enfants, eski nous pas faire zot bane demandes? De même, bane demandes aussi faire à bane dimounes au nom d'Allah.

Allah fine clarifié ki Li vine en aide à sa bane dimounes là et accorde zot la victoire lors zot bane l'adversaires malgré bane grands ressources ki sa bane l'adversaires là ena. Dans l'histoire de l'islam et du Jamaat Ul Sahih Al Islam, nous fine atteindre aussi ene l'étape aussi critique que sa.

La question à résoudre li la suivante: De ki façons tous bane di biens et bane ressources du Jamaat Ul Sahih Al Islam bizin être présentés et, même sacrifiés – si bizin – pour la cause d'Allah, et comment pour servi sa aide là? C'est pas ene décision facile pou prend parski li implique certains de bane questions ki pli importantes et pli fondamentales. La nuite, lizour, mo engagé dans recherche guidance divines et mo réfléchi très profondément lors sa bane problèmes compliqués là.

À sa stade préliminaire là, mo sollicite zot l'aide sous forme de bane *duahs* sincères et répétitifs, ki sorti du profond de zot les cœurs afin ki Allah (twt) capave guide moi et montrer moi ene chemin couma pou faire l'Islam triompher en éveillant la conscience de bane musulmans et de l'humanité. Nous pas pou capave faire nannié si bane dimounes pas réalise la gravité de la situation. Li extrêmement important ki zot bane sentiments, zot bane motivations, zot conduite et zot bane actions zot en conformité totale avec So bane volontés. Fine décrété ki c'est avec So l'aide ki zot pou gagne la victoire lors tous les reste. Sa décret là li interchangeable. Le mouvement et le rythme de sa le monde là et de

bane corps célestes [c'est-à-dire, la lune, soleil, et bane planètes] capave changer et la création entière capave anéanti, mais le décret d'Allah pas pou changer. Le décret d'Allah li pas sujet à modification. C'est saki nous apprécier et c'est dans sa ki nous croire le plus [ki bane décrets d'Allah pou accomplir, arrive séki arrive]. Nous pou vive et croire là-dans et nous pou mort aussi en croyant fermement là-dans.

Mo pas pou hésiter, et mo pas peur pou faire bane sacrifices de mo part et au nom du Jamaat Ul Sahih Al Islam parski Allah fine élève nous pour sa travail délicat mais très important là. Par So miséricorde, Li fine donne nous courage, résolution et constance [patience]. N'importe kan l'occasion pou exige de moi, mo bane sacrifices, mo pas pou tourne lédos à aucaine de sa bane sacrifices là, malgré ki grandeur sacrifice là été. Mais Allah fine accorde moi ene certain sagesse. Essentiellement dans tout la lutte, premier l'étape c'est l'exercice prudent de sa faculté là. Nous bizin assure nous ki ni ene once, ni ene iota de bane ressources du Jamaat Ul Sahih Al Islam, et celui de l'islam dans so l'ensemble pas gaspillé.

Nous bizin garde à l'esprit ki bane tels sacrifices comme au temps de Jésus (as) et du prophète Muhammad (saws) bizin revivre dans nous l'époque, et c'est nous devoir pour faire li revivre parski sa c'est la Volonté d'Allah. Si Allah pas ti guide moi vers sa verset là et mo pas ti explique zot sa, eski zot ti pou conner ki Allah [et So Khalifatullah] pé attane de zot ? Dans bane l'époques de bane manifestations divines, c'est Allah ki dirige So élu par le Saint-Esprit (*Ruh'il Quddus*) et c'est Li (Allah) ki provoque ene changement dans le monde à travers li (So Messenger). C'est au peuple maintenant pou écouter et respecter bane conseils du Messenger / réformateur d'Allah afin ki zot réussi goûte le vrai fruit de l'Islam, et sa fruit là c'est l'amour d'Allah ki pure; ene tel l'amour ki Allah fine réservé à bane ki fine sacrifier tout pour So cause, afin ki So *Deen* capave être fermement établi lors la terre. C'est sa le travail ki nous bizin accomplir et nous pas pou capave faire li par nous-mêmes. Dans sa travail béni là, nous bizin également l'aide d'Allah, pareil couma ene z'enfant faible ki so papa contrôle so bane mouvement, kot li prend so la main et dirige li pou faire ene travail, et après, malgré ki c'est papa là ki fine faire tout travail, mais en signe d'amour pour so zenfant, li tappe li doucement lors so lédos en signe de félicitation – li dire : « *Bravo mon fils !* » – et faire so éloges pou sa action ki li fine faire là.

Par conséquent, sans Allah, sans So l'aide, nous pas pou capave faire nannié. Nous bizin l'aide d'Allah pour agir comme So l'aide dans So cause. Allah appelle nous pou aide Li, bien ki Li pas bizin aucaine aide, mais Li faire sa seulement pou mette nous à l'épreuve. Li donne nous bane tels tests ki vine couma ene revitalisation de nous la foi, en particulier dans sa l'époque là, dans l'époque d'ene Messenger d'Allah, bien ki sa Messenger d'Allah là li pas porteur d'aucaine nouvo la loi.

Aucaine dimoune avec pouvoir [limité] de l'homme [mo man in the power of man] jamais pas pou capave faire l'islam disparaite. Le Jamaat Ul Sahih Al Islam fine être établie par Allah pour défanne bane valeurs de l'Islam, pour protège la sainteté du Saint Coran et de *Sunna* et bane l'enseignements du Saint Prophète Muhammad (saws), et du Messie d'Allah, Hazrat Mirza Ghulam Ahmad (as). Après sa humble serviteur [présent] là, à sak fois ki l'islam pou en danger, Allah pou continuer envoie So bane élus dans l'époque ki bizin pour défanne l'honneur et la dignité de l'islam. L'islam li le dernier religion ou mode de vie, tout comme li ti le premier et le plus important mode de vie depuis le commencement de la création, le commencement du temps.

De ce fait, mo conseille tous bane musulmans, et mo bane disciples en particulier, pas peur pou sacrifier ou richesse et ou propre êtres dans le chemin d'Allah. Bane tels moments zot bane moments bénis. Partout kot ena l'injustice, faire la justice. Trace zot marque lors sa la terre à travers zot lien avec Allah et nous noble prophète Muhammad (saws) et sa humble serviteur [ki présent devant zot dans sa siècle là]. Faudé pas nous oublier aussi tous bane sacrifices ki Hazrat Mirza Ghulam Ahmad (as) fine faire dans so l'époque, li et ainsi ki tous bane ki ti sincères avec li. Allah fine montré nombreux de bane signes de la gloire et de la victoire de l'Islam à travers li. Li ti également ene Messie, le Messie Promis de so l'époque, le premier Messie islamique et moi, mo le deuxième. Nous tous les deux nous bane images de Jésus (as). Quant à Hazrat Muhammad (saws), li ti vini après Jésus (as) pour perfectionne le *Deen* d'Allah en établissant le dernier code final, c'est-à-dire le Saint Coran. *[Mo fine servi sa bane mots dernier et finale là pou mette l'accent lor le fait ki le Quran li absolument le dernier code de loi ki Allah fine révélé, et malgré ki Li pou contigner causer et donne bane l'instructions à So bane serviteurs et réformateurs de l'Islam, So bane Messagers islamiques, mais aucaine d'entre zot pas pou apporte aucaine nouvo la loi. C'est le Saint Coran tousel ki dernier la loi, pareil couma le Saint Prophète Muhammad (saws) tousel le dernier prophète porteur de loi.]* Mais le Saint Coran étant le code final, sa veut

pas dire ki Allah fine maintenant arrête causer ou ki le Saint-Esprit fine arrête so mission pou transmette bane révélations divines. Non! Mo ene l'exemple vivant de sa aujourd'hui, et comme par le passé, Allah causer et Li bizin zot l'aide pour consolide l'islam à travers zot bane sacrifices.

Alors, **Ki sanlà pou vine mo bane aides dans la cause d'Allah?** Nous bien faibles, mais anou prier: **Ô Allah, combler nous faiblesses avec To Puissance, augmente nous l'amour pour Toi afin ki sa l'amour là trouve ene chemin vers Toi, ki illumine nous chemin vers le bonheur dans sa la vie là et Aakhérat. Nous pas ena aucaine pouvoir, nous bien faibles et Toi To tout-puissant, et bien Grand. Aide-nous Ô Allah pour tenir nous bane promesses et pou aide l'Islam à travers l'avènement de To Khalifatullah de sa l'époque là en fournissant l'aide ki li bizin pour la victoire de l'Islam. Kan nous pou aide li, Ô Allah, nous pou aide Toi, nous pou accomplir nous devoir envers Toi. Béni-nous avec succès dans sa travail là et débarrasse-nous de tous bane l'ennemis ki rode humilier et fini l'Islam et bane musulmans. Ameen, Summa Ameen, Ya Rabbul Aalameen.**